



# LETTRE MENSUELLE

"Le Royaume des cieux est tout près de vous" Guérissez les malades, rendez la vie aux morts, guérissez les lépreux, chassez les esprits mauvais. Vous avez reçu gratuitement, donnez donc gratuitement"

BUREAU CENTRAL DE LA FPMA

DECEMBRE 2020

N° 011

## Miverina indray ny "Lettre mensuelle"

Noho ny nidirantsika tao anatin'ny fihobohana dia tamin'ny volana Marsa - Aprily 2020 no farany namoahantsika ny "Lettre Mensuelle".

Ifonana amintsika rehetra izany satria tena samy sahirana ireo tompon'andraikitra isan-tsokajiny noho ireo andraikitra vaovao izay tsy maintsy noraisana mba hitohizan'ny fiainam-panahin'ny rehetra eto amin'ny FPMA, na dia eo aza ny fihobohana:

Efa niarahantsika nahita ary mbola iainantsika hatramin'izao ireo fotoana samihafa atao ao amin'ny Radio Vatsy sy ny Radio Anjomara:

■ Ny fotoam-pivavahana isan'Alahady izay mifameno amin'ny ataon'ny Tafo FPMA hafa na ireo Fiangonana rahavavy hafa

■ Ny Veillée de prière isan'andro izay sady fitaizam-pinoana no fampianarana ny tenin'Andriamanitra ho antsika Mpino

Teo amin'ny lafiny serasera dia nohezahina koa izay tsy ahatapaka ny fifandraisan'ny Mpino rehetra amin'ny ambaratonga isan-karazany ato amin'ny FPMA:

Noho izany dia natao izay nahavita ny "Application FPMA-FRANCE" ao amin'ny "Android" sy ny "Apple"

Marobe ny azontsika jerena ao anatin'io Application io:

- Ny toerana misy Tafo FPMA akaiky anao ohatra

- Ireo tompon'andraikitra isan-Tafo sy Faritany

Tohiny P.2



**"Ary ny Teny dia tonga nofo ka nonina tamintsika; ary hitanay ny voninahiny, dia voninahitra miendrika ho an'ny Lahitokana avy tamin'ny Ray, sady feno fahasoavana sy fahamarinana".**

Jao 1.14

## IREO FITAHIAM-PANAHY

Iaraha-mahafantatra ny fahasarotan'ny fiainana ankehitriny ateraky ny aretina Covid-19.

Tsy azo lavina anefa fa nisy nahasoa ihany amin'ny lafim-pianana sasany teo amin'ireo fepetra izay tsy maintsy noraisin'ny mpitondra fanjakana mba hiadiana amin'ny aretina.

Ho antsika FPMA manokana ohatra dia teraka tao anatin'ny fihoboana ireo fotoana samihafa izay tena nandraisan'ny maro tamintsika fahasoavam-panahy sy fitahiana. Anisan'izany ny "**Fiaraha-mivavaka isan'andro**" na ny "**Veillée de Prière**"

Nampiray ny fianakaviana koa ireny fotoana ireny.

## NY SAMY MAKHA HO AZY

Ny indro kely dia ity, nampitombo ny toe-tsaina izay efa manjaka eo amin'ny olona maro ankehitriny ny fihoboana. Izany toe-tsaina izany dia ny "**samy maka ho azy**".

Tena mampalahelo sy mampanahy fa toa mety amin'ny maro izany samy maka ho azy izany. Tsy mahasoa ny fifaneraserana mihitsy ity fihoboana ity. Indrindra moa raha efa nisy disadisa talohan'ny nidirana tamin'ny fihoboana dia tena mahamenatra

eo anatrehan'Andriamanitra fa mety amin'ny Mpino maro ny "samy maka ho azy".

## NY FANAHIH'NY KRISMASY

Tsy izany anefa ry havana ny fanahin'ny Krismasy.

Ny fanahin'ny Krismasy dia ao amin'ny teny hoe: "**Ary ny Teny dia tonga nofo ka nonina tamintsika; ary hitanay ny voninahiny, dia voninahitra miendrika ho an'ny Lahitokana avy tamin'ny Ray, sady feno fahasoavana sy fahamarinana**"

Jesosy Kristy no lazaina amin'izany ry havana.

Ny fanontaniana mipetraka dia izao: "**Hanao inona ny nahatongavan'ny Tompo teto amin'izao tontolo izao?**" Hihavana amintsika zanak'olombelona, hampiahavana antsika amin'Andriamanitra ary hampihavana antsika samy isika.

## FIHAVANANA

Azon'i Jesoa natao ny nihiboka tao an-dapany any an-danitra satria fantany fa ety amin'izao tontolo izao dia misy aretina ratsy ary mafy lavitra noho ny Covid-19 satria aretina mahatonga fahafatesana mandrakizay raha tsy voatsabo. Tsy inona izany fa ny fahotana.

Tohiny P.2

## Miverina indray ny "Lettre mensuelle" (Tohiny)

Ao koa ireo "Confession de foi protestante" isan-karazany, "Catéchisme"

Misy Toriteny sy fampianarana azonao henoina koa ao ets...

Tsy ho ela dia hisy koa ny "film" fitaizam-pinoana

Akoatr'ireo fandaharana efa mahazatra ny maro ao amin'ny Radio toa ny "Mana isan'andro", ny Fiaraha-mivavaka, dia misy fandaharana vaovao "Vakiteny sy Hira" izay mikasika ny Perikopa isan'Alahady sy ny hira mifanaraka amin'izany, ny tantaran'ny Hira sy ny mpamorona. Tena manampy ny Mpitandrina na izay olona hitarika fotoana ny alahady izany.

Manomboka amin'ny volana Janoary 2021 dia ho hezahina tsy ho tapaka intsony ny "Lettre Mensuelle".

Koa mangataka antsika rehetra mba ahatsiaro an'izany am-bavaka ka ho tena fitaovana hampandrosoana ny finoantsika sy ny fifankatiavana eto anivon'ny FPMA tokoa izany ary ho voninahitr'Andriamanitra Raintsika sy Jesosy Kristy Tompo;

Pasteur Seth RASOLONDRAIBE



Téléchargez l'Appli FPMA FRANCE



# KRISMASY FIHAVANANA

Hoy ny Romana 6.23 "Satria fahafatesana no tambin'ny fahotana, dia ny fanomezan'Andriamanitra maimaimpoana kosa dia fiainana maharitra mandrakizay ho an'izay ao amin'i Kristy Jesoa Tompontosika".

Tonga ny Tompo satria tena tiany ny hihavana amintsika ary antoky ny fiainana mandrakizay koa izany.

Koa ny fanahin'ny Krismasy izay tian'Andriamanitra hampitaina amintsika dia ny fihavanana.

Aoka isika hihavana. Ny Tompo no efa miantso antsika ho amin'izany.

Tamin'ity taona 2020 ity manokana dia maro ireo havantsika sy namantsika no nandao antsika ho any amin'ny Ray. Feon-dakolosy ireny rehetra ireny ilazana amintsika fa mandalo izao fiainana izao.

Koa aoka isika hihavana ao amin'i Jesosy Kristy.

Amin'ny anaran'ny Birao Foibe P Seth RASOLONDRAIBE

## FANDAHARANA KRISMASY 2020

### FEON'ORGA

### ANTOKO MPIHIRA

### FIFAMPIARAHABANA - FIANTSOANA

**HIRA:** 67, and. 1, 2 sy 3 "Avia ry mino hifaly sy hihoby"

### VAVAKA FIHAONANA

### SITRAPON'ANDRIAMANITRA

### FIAIKEN-KELOKA

**Mpitarika :** Vavaka

**Fiangonana :** « Ry Rainay be famindram-po ô, mitalaho aminao izahay ; mamela ny helokay ;

Diovy izahay ho afa-pahotana ; sasao izahay ho afa-keloka ; ary havaozy ny fanahinay mba ho vononkanompo anao. Ny fitiavan'i Jesosy Kristy Zanakao Mpamonjy anay no angatahanay Aminao. Amena. »

**HIRA :** Ry Andriamanitra Tompo Ray any an-danitra ô, mamindrà fo aminay !

Ry Jesosy Tompo Mpamonjy izao tontolo izao, mamindrà fo aminay !

Ry Fanahy Masina Tomponay Mpampionona ô, mamindrà fo aminay !

### TENY FAMELAN-KELOKA SY FIHAVANANA

**Mpitarika :** Teny famelan-keloka

**Fiangonana:** AMEN

### FANKALAZANA

**Mpitarika :** Voninahitra any amin'ny Avo indrindra ho an'Andriamanitra

**Fiangonana :** Ary fiadanana ho ety ambonin'ny tany amin'ny olona ankasitrahany.

**HIRA :** 53 "Miposaka ny vonjy" [mitovy feo amin'ny 13]

### FAMAKIANA NY TENIN'ANDRIAMANITRA

**HIRA :** 45, and. 1 sy 3 ("He tonga ho antsika")

**Mpitarika :** Ho aminareo anie ny Tompo

**Fiangonana :** Ary ho amin'ny fanahinao

**Mpitarika :** Vavaka noho ny Teny

- TESTAMENTA TALOHA : Isa. 52, 7 - 10

- EPISTILY : Heb. 1, 1 - 6

- FILAZANTSARA : Jao. 1, 1 - 18

**Fiangonana :** Isaorana anie ny Tompo noho ny Filazantsara !

### FANEKEM-PINOANA

**HIRA :** 63 ("Tany finaritra tarafin-danitra")

### TORITENY

### FEON'ORGA

### ANTOKO MPIHIRA

### FILAZAN-DRAHARAHA

### FANDRAISANA NY FANASAN'NY TOMPO

**HIRA:** 71, and. 3 sy 4 ("Mba omeo ny fonao fa angatahiny")

**Mpitarika:** Ho aminareo anie ny tompo ! Aoka hizara ny fiadanana isika

**Fiangonana :** - Ho aminao anie ny Tompo ! - Ary ho aminao koa

## PRÉFACE (Mitsangana)

**Mpitarika :** Eny tokoa Tompo ô, Ray Masina, Andriamanitra mandrakizay, mahefa ny zavatra rehetra, mety sy mahavonjy ny isaoranay Anao amin'ny fotoana rehetra sy amin'ny toerana rehetra amin'ny alalan'i Jesoa Kristy Tomponay, izay tia anay sy nanolo-tena hamonjy anay ; amin'ny alalany koa no ideran'ny anjely ny fiandriananao sy itsaohan'ny fanapahana sy ny fahefana rehetra Anao amin'ny tahotra ary iarahan'ny fiangonana any an-danitra sy ety an-tany midera ny Anaranao amin'ny fihobiana ary izahay koa ankehitriny miara-manandrata ny feonay aminy, ka amin'ny fanajana lehibe no ideran'ny hoe :

**HIRA :** Antema 1 ( Sanctus )

Masina ! Masina ! Masina Jehovah Tompo ! Feno ny voninahitrao izao rehetra izao ry Tompo ô ! Amena

## VAVAKA

**Mpitarika :** Ry kristiana malala, aoka isika hahatsiaro an'i Jesoa Kristy izay maty nisolo antsika sy nitsangana ho fanamarinana antsika, dia fanatipihavanana natolotr'Andriamanitra antsika, ary aoka isika hiara-misaotra sy hivavaka :

Misaotra Anao izahay Andriamanitra Rainay, Tompon'ny lanitra sy ny tany, fa noho ny famindram-ponao aminay mpanota mahantra, dia nomenao ny Zanakao Lahy tokana, mba tsy ho very izay rehetra mino azy fa hanana fiainana mandrakizay.

**Fiangonana :** Efa maty Kristy, efa nitsangana Kristy ary ho avy amboninahitra.

**Mpitarika :** Noho izany Ry Tompo, rainay any an-danitra ô, indreto izahay manao eto anatrehanao ny fahatsiarovana ny fahatongavan'ny Zanakao ho olona, ny fijaliany sy ny fahafatesany, ny fitsanganany tamin'ny maty ary ny fiakarany tamim-boninahitra sy ny fifonany mandrakizay ho anay, ka miandry sy mitalaho ny fiverenany izahay.

**Fiangonana :** Amena, Avia Jesoa Tompo !

**Mpitarika :** Ankehitriny, Ray ô, aidino ny Fanahy Masina mba hameno ny fonay ka handraisany

tokoa ny Tomponay amin'ny finoana velona amin'izao izy manatona anay amin'izao fanasana izao. Fa ny Fanahy Masina no aharianao, amelomanao, anamasinanao ary anomezanao anay ny zava-tsoa rehetra.

**Fiangonana :** Amena, avia Fanahy Masina !

**Mpitarika :** Misaotra anao izahay ry Jeso Kristy Tompo ô ! Midera ny Anaranao izahay ry Zanak'Andriamanitra Lahy Tokana Mpamonjy anay ! Ankalazaina anie hianao noho ny fitiavanao izay mahery noho ny fahafatesana. Ary izahay izay tonga eto anatrehanao hiombona amin'ny latabatrao dia mangataka mba hampiraisona aminao, ohatrin'ny sampana amin'ny voaloboka. Ampianaro hifankatia tahaka ny nitiavanao anay izahay, ary aoka izahay hiara-manana amin'ny fiangonana masina manontolo ny fiononana sy ny fijaliana aminao, dia hianao izay miara-manjaka amin'ny Ray sy ny Fanahy Masina hatramin'ny taloha indrindra ka ho mandrakizay.

**Fiangonana :** Amena !

## TENY FANORENANA SY FANAMASINANA

**Mpitarika :** Jeso Kristy Tompo tamin'ny alina izay namadihana azy dia nandray ny mofo, ary rehefa nisaotra izy dia novakiany ka hoy lzy :

« Raiso, hano, ity ny tenako izay omena ho anareo, izao no ataovy ho fahatsiarovana ahy. »

Ary toy izany koa ny kapoaka rehefa nihinana, dia hoy izy :

« Misotroa amin'ity hianareo rehetra, fa ity no rako dia ny amin'ny fanekena vaovao izay alatsaka ho an'ny rehetra ho famelan-keloka. Koa na oviana na oviana no misotro hianareo, dia izao no ataovy ho fahatsiarovana Ahy. »

Misaotra ny Ray, izay nampahamendrika antsika hanana anjara amin'ny lovan'ny olona masina eo amin'ny mazava. Amena.

**HIRA :** 117 (Agnus Dei)

**Mpitarika :** Efa nandray ny fanahy maha-zanak'andriamanitra antsika isika, koa izany no hahafahantsika manatona ny ray, hoe

**Fiangonana :** Vavaka nampianarin'ny Tompo

## FANASANA

**Mpitarika :** Ny mofo izay vakiantika dia firaisana amin'ny tenan'i Jesoa Kristy Tompotsika.

Ny kapoaky ny fisaorana izay isaorantsika dia firaisana amin'ny ran'i Jesoa Kristy Tompotsika.

Hoy ny Tompo : Andeha, efa voavotra avokoa ny zavatra rehetra !

## FANDRAISANA

Hira: 75, 73, 62, 54, 61

## TENY FAMPAHEREZANA

(mitsangana)

**Mpitarika :** Jeso Kristy Tompotsika izay voahombo tamin'ny hazo fijaliana ka nitsangana tamin'ny maty no efa nanome anareo ny tenany sy ny rany izay nanavotany anareo tamin'ny fahotana rehetra, lzy anie hampahery sy hiaro anareo amin'izany amin'ny finoana marina ho fahasambarana mandrakizay. Ho aminareo anie ny fiadanana !

**Fiangonana :** AMENA

**HIRA :** 266

« Ry Jeso Tompo, Hianao »

## VAVAKA FISAORANA SY FANGATAHANA

### HAFATRA SY TSODRANO

**HIRA :** 68, and. 1

“Re tokoa ny feon'anjely”

**Mpitarika :** Tsodrano

- Hira : 68, and. 3 (

“Be ny lazanao ry Tompo”

**Mpitarika :** Voninahitra ho an'andriamanitra ray sy zanaka ary fanahy masina izay hatramin'ny taloha indrindra ka ho mandrakizay. Amena.

Mandehana amin'ny fiadanana, ka manompoa ny Tompo !

**Fiangonana :** ISAORANA ANIE ANDRIAMANITRA !

## FEON'ORGA FIRAVANA

Culte à suivre sur  
Radio Vatsy sy Radio Anjomara  
le vendredi 25 - 12 - 2020

à 10h30 et 15h00  
Traduction simultanée par  
téléphone

Numéro : 01 70 48 90 28  
Code: 3138217#